



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

A nr. 5/2019

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët Adnan Konushevi kryesues, Fejzullah Rexhepi dhe Faton Ademi anëtarë, me pjesëmarrjen e zyrtares së lartë ligjore Valbona Millaku Foniqi, duke vendosur lidhur me apelin e kandidates për deputete nga subjekti politik Partia Euroatlantike e Kosovës (PEK), Selvete Ibrahim, me seli në Prishtinë, të paraqitur kundër vendimit të Komisionit Qendror të Zgjedhjeve (KQZ) nr. 971/2019 të datës 09.09.2019, për tërheqjen nga lista e kandidateve për deputet në Zgjedhjet e Parakohshme për Kuvendin e Republikës së Kosovës që do të mbahen me datën 06 tetor 2019, në seancën e mbajtur me 13.09.2019, mori këtë:

V E N D I M

I. PRANOHET si i bazuar apeli Anr.5/2019 i datës 11.09.2019 parashtruar nga kandidatja Selvete Ibrahim nga Mitrovica, lidhur me tërheqjen nga lista e kandidateve për deputet nga Partia Euroatlantike e Kosovës (PEK).

II. NDRYSHOHET vendimi i Komisionit Qendror Zgjedhor (KQZ), me Nr. 971/2019 të datës 09.09.2019 dhe **DETYROHET** që kandidaten Selvete Ibrahim nga Mitrovica, ta tërheq nga lista e kandidateve për deputet nga Partia Euroatlantike e Kosovës (PEK)

Arsyetim

Me datën 11.09.2019, PZAP-i ka pranuar apelin e dorëzuar nga Selvete Ibrahim, kandidate për deputet në Zgjedhjet e Parakohshme për Kuvendin e Republikës së Kosovës, nga subjekti politik Partia Euroatlantike e Kosovës (PEK), me të cilin kërkon nga PZAP-i që të tërhiqet nga lista e kandidateve për deputete e subjektit në fjalë, pasi që ajo për arsye personale nuk mund të jetë në listën për kandidate, dhe kjo për faktin se e njëjta thekson se ka qenë një vendim i ngutshëm dhe i pa menduar mire nga ana e saj.

Parashtruesja e apelit kërkon nga PZAP-i, që të i aprovohet kërkesa e parashtruar.

PZAP-i, pas pranimi të apelit në kuptim të nenit 12 paragrafi 1 të Rregullave dhe Procedurave të PZAP-it, e informoj KQZ-në për apelin që është bërë ndaj vendimit nr.

971/2019 të datës 09.09.2019, të KQZ-së, dhe ka kërkuar përgjigje lidhur me vendimin ndaj te cilit është parashtruar apeli.

KQZ, përmes përgjigjes me shkrim i referohet dhe të njëjtën kohë i citon dispozitat ligjore të LZP-së, sipas interpretimit të së cilave deklaron se këto dispozita nuk parashohin mundësin e tërheqjes vullnetare të kandidatëve nga lista zgjedhore e subjektit politik me të cilin garon, përveç nëse ajo kërkohet me vendim të PZAP-it, kandidati është pjesë e listës se një subjekti tjetër politik ose ndërron jete, pra ligji nuk lejon KQZ-në, ta tërheq nga lista kandidatin e certifikuar, pasi që KQZ nuk mundet as ta kundërshtoj as t'i vërtetoj arsyet personale të kandidateve, pasi që KQZ mundet vetëm të garantoj për rregullsinë e procesit të aplikimit dhe certifikimit. Si dëshmi ka bashkangjitur: formularin për certifikim të kandidates Selvete Ibrahim, formularin financiar të kandidates në fjalë, shkresat nga ZRPPC-ja për subjektin politik PEK dhe listën e kandidateve të këtij subjekti.

Paneli Zgjedhor për Ankesa dhe Parashtrës – PZAP-i, pas shqyrtimit të shkresave të lëndës dhe pas administrimit të pretendimeve ankimore, vendimit kontestues të datës 09.09.2019 me numër protokolli 971/2019 të KQZ-së dhe përgjigjes në apel të KQZ gjeti se:

Apeli është i bazuar

PZAP-i, vlerëson se qëndrimi juridik i KQZ-së, është i kundërligjshëm pasi i njëjti është marrë me zbatim të gabuar të së drejtës materiale. Në rastin konkret KQZ-ja, gabimisht ka zbatuar të drejtën materiale në raport me deklarimin e kandidatit për tërheqje nga lista e kandidatëve për deputet nga radhët e partisë PEK, meqenëse dispozita të cilës i referohet KQZ-ja, neni 28.1 nuk e sanksionon si ndalese kandidaten për tërheqje nga lista e kandidatëve, nëse kjo bëhet brenda afatit kohor dy ditor para hedhjes së shortit. Meqenëse e vetmja ndalese në rastin konkret është tërheqja pas periudhës apo afatit 2 ditor, shkaqet tjera të tërheqjes nuk janë me relevancë as për KQZ-en, e as për PZAP-në, meqenëse është e drejtë e kandidatit se a dëshiron të garoj në zgjedhje apo jo.

Tërheqja e një kandidati nga listat e kandidatëve nga një subjekt politik ose nga vet kandidati është e rregulluar me LZP konkretisht me nenin 28.1 të LZP-së, ku përcaktohet se: “subjekti politik i certifikuar mund të tërhiqet nga procesi zgjedhor duke i dorëzuar kërkesën KQZ-së, për tërheqje jo më vonë se dy (2) ditë të punës para datës së caktuar për hedhje të shortit”, ku sipas kësaj dispozite apeli i parashtruar nga ana e kandidates Selvete Ibrahim, është paraqitur brenda afatit kohorë të përcaktuar me LZP-në.

Paneli konstaton se apeli është i bazuar pasi që neni 122.1 pika c, i LPZ-së, përcakton se: “nëse kandidati pas certifikimit nuk dëshiron të marrë pjese në procesin zgjedhor mund të parashtrtoj apel në PZAP”. Andaj mbi këtë bazë paneli konstaton se apeli është i bazuar duke marrë parasysh faktin se kandidatja për deputet Selvete Ibrahim, për arsye

personale nuk dëshiron që të jetë pjesë në listat zgjedhore për zgjedhjet e Parakohshme për Kuvendin e Republikës së Kosovës që do të mbahen me datën 06 tetor 2019. Asnjë dispozitë ligjore e LZZP-së, nuk e sanksionon të drejtën e tërheqjes së kandidatit nga lista zgjedhore krejt kjo në kuptim të parimit se e drejta për të zgjedh dhe për t'u zgjedh është e drejt individuale e secilit dhe se në asnjë mënyrë nuk paraqet detyrim, përndryshe kjo do të përbente cenim të drejtave të njeriut.

E drejta për të zgjedhur dhe për tu zgjedhur është e drejtë dhe jo detyrim i paraparë me Kushtetutën e Republikës së Kosovës neni 45: "*Çdo shtetas i Republikës së Kosovës që ka arritur moshën tetëmbëdhjetë vjeç, qoftë edhe ditën e zgjedhjeve, gëzon të drejtën të zgjedhë dhe të zgjedhet, me përjashtim kur kjo e drejtë i kufizohet me vendim gjyqësor*". Andaj çfarëdo kufizimi apo interpretimi tjetër jashtë këtij domeni dhe jo mbi bazën e rregullimit ligjor nënkupton shkelje të të drejtave të njeriut.

- Me nenin 53 par. 1 të Ligjit për Procedurën e Përgjithshme Administrative, përcaktohet: "*Një akt administrativ mund të anulohet apo shfuqizohet, sipas detyrës zyrtare, nga organi publik që ka kompetenca të nxjerrë aktin, nga organi i tij mbikëqyrës apo nga një organ tjetër i përcaktuar shprehimisht me ligj.*"

- Me nenin 131 par. 4 të Ligjit për Procedurën e Përgjithshme Administrative, përcaktohet: "*Kur organi publik kompetent vlerëson se ankesa është e pranueshme dhe e bazuar plotësisht, me një akt të ri administrativ do të anulohet apo ndryshohet aktin e ankimit, gjegjësisht do të lëshohet aktin e refuzuar, siç është kërkuar nga pala, dhe PZAP-i, meqenëse e aprovoi të bazuar apelin e kandidatës për deputet nga partia PEK, vendimin e KQZ-së, e ndryshoi dhe vendosi që të njëjtës t'ia lejoi tërheqjen nga lista e kandidatëve për deputete nga radhët e partisë PEK.*"

Andaj në bazë të nenit 122.1 pika c, dhe nenit 118.1, të LPZ-së, neneve: 53 par. 4, 131.4 dhe 131.5 të Ligji për Procedurën e Përgjithshme Administrative u vendosi si në dispozitiv të këtij vendimi.

Paneli Zgjedhor për Ankesa dhe Parashtresa

A nr. 5/2019 më datën 13.09.2019

Kryesuesi i Panelit
Adnan Konushevc

Këshillë Juridike:

Kundër këtij vendimi është e lejuar ankesa sipas nenit 118 par. 4 të LPZ-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimi të këtij vendimi.